



ОКРУЖНОЕ ПОСЛАНИЕ

СТАРООБРЯДЧЕСКИХЪ

ЕПИСКОПОВЪ,

ИЗДАННОЕ

24-го февраля 1862 года.

НАПЕЧАТАНО СЪ ПОДЛИННИКА.



МОСКВА.

Тип. П. П. Рябушинскаго, Страстной бул., Путинковскій пер., соб. домъ.

1911.



2005083617

ОТЪ ИЗДАТЕЛЯ.

«Окружное Посланіе» издано было старообрядческими пастырями въ обличеніе безпоповскихъ неправыхъ мудрованій и въ огражденіе отъ нихъ древлеправославныхъ чадъ Церкви Христовой. Оно не разъ печаталось и за границей и въ Россіи. Но въ настоящее время представляетъ большую рѣдкость. Заграничныя изданія его совсѣмъ не встрѣчаются въ продажѣ, а русскія изданія, вышедшія въ свѣтъ подъ редакціей враговъ старообрядчества, не пользуются среди старообрядцевъ довѣріемъ, какъ снабженныя разнаго рода примѣчаніями полемическаго характера. Между тѣмъ многимъ христіанамъ желательно познакомиться съ содержаніемъ «Окружнаго Посланія», какъ съ цѣннымъ и рѣдкостнымъ историческимъ памятникомъ. Съ этой цѣлью и предпринято настоящее изданіе. Оно напечатано съ подлинника и снабжено автографомъ лицъ, подписавшихъ «Посланіе». Такое изданіе выходитъ впервые. Нужно надѣяться, что оно принесетъ большую пользу старообрядчеству, ознакомивъ всѣхъ лицъ, не читавшихъ «Окружное Посланіе» съ подлиннымъ твореніемъ старообрядческихъ пастырей. Да послужитъ же оно укрѣпленію церковнаго мира и единомыслію церковныхъ чадъ.

Издатель *И. П. Федоровъ*.

66-11-05

ОКРУЖНОЕ ПОСЛАНИЕ

*Единыя, Святыя, Соборныя, Апостольскія. Древле-
православно-каѳолическія Церкви.*

Возлюбленнымъ чадамъ единыя, святыя, соборныя, апостольскія, древле-православно-каѳолическія Церкви, всѣмъ и повсюду пребывающимъ, хранящимъ и соблюдающимъ священныя догматы правыя вѣры, и преданія святыхъ апостолъ и святыхъ и богоносныхъ отецъ, пастырей и учителей вселенскихъ.

Благодать и милость и миръ отъ Бога Отца и Господа нашего Ісуса Христа и Пресвятаго и споклоняемаго Духа, да будетъ со всѣми вами. Аминь.

Всяко тщаніе и подвизаніе должны есмы имѣти, возлюбленніи, еже послѣдовати ученію Божественныхъ Писаній и хранить священныя каноны и преданія святыхъ апостолъ и святыхъ отецъ, иже на седми вселенскихъ и девяти помѣстныхъ соборѣхъ въ различныя времена собравшихся на истребленіе богомерзскихъ ересей и на утверженіе правыхъ вѣдній, о нихже божественный апостолъ взываетъ, глаголя: Помните наставники ваша, иже глаголаша вамъ слово Божіе, ихже взирающе на скончаніе жителства, подражайте вѣру ихъ; и въ наученія странна и различна не прилагаетеся ¹⁾).

¹⁾ Ко Евреомъ зач. 334.

Внимающе сему, должны есмы блюстися всякихъ ересей и раздоровъ, явленныхъ же и неявленныхъ; держати же и хранити догматы вѣры и преданія церковная цѣла же и не превратна, по реченному: Не предлагай предѣлъ вѣчныхъ, яже положиша отцы твои ¹⁾. Сего ради прилежно «испытаемъ писанія и преданія отецъ, и сихъ возревнуемъ, и якоже обрѣтохомъ Церковь отъ Христова шествія, сие ты сохранимъ, сие и предадимъ, а не отлучаемъ себе отъ отецъ нашихъ, иная прочитающе, а иная разумѣвающе» ²⁾.

Сія убо во умѣ обносяще, подобаетъ намъ среднимъ царскимъ путемъ шествовати, не уклоняющесе ни на десно, ни на шуе, и отъ всякихъ злохуленій отвращатися, удалятижесе кривосказательнаго ученія и лжеименнаго разума. Мнози бо лжеучители и лжепророцы изыдоша въ мѣръ ³⁾, иже положиша на небеси уста своя, и языкъ ихъ переходитъ по земли ⁴⁾, отъ нихже овѣи убо явленно ратующе древняя святыхъ отецъ законоположенія и уставы, овѣи же древлецерковнымъ преданіемъ послѣдующе, но не правомудрствующе, иже отъ десна украдаеми и аки по ревности древлецерковнаго благочестія, истѣбе же рещи, по своему лжеумствовованію, составляютъ богопротивнаго мудрованія свитки и лжесловесныхъ ученій тетради, и дающе имъ подъ именемъ святыхъ благовидныя названія, развращаютъ правое ученіе свя-

¹⁾ Притчей гл. 22.

²⁾ Сборникъ Большой, листъ 337 на оборотѣ.

³⁾ 1. Іоан. зач. 73.

⁴⁾ Псаломъ 72.

тыя Церкви, и ядомъ своего мудрованія напояють сердца незлобивыхъ и влекутъ въ смерть. Яже вся изчисляти нѣсть настоящаго времени; обаче въ кратцѣ нѣкая воспомянуги необходимо нужно и зѣло благопотребно есть.

Обносимы убо суть тетради нѣкія лжесоставленныя, не точію священному Писанію несогласныя и здравому разуму противныя, но и богохульнаго мудрованія пре-наполненныя, яже здѣ на среду да предложатся:

1. Первое мѣсто занимаетъ тетрадь подъ названіемъ сицевымъ: Апокалипсисъ седмитолковой.

2. Тетрадь подъ заглавіемъ: Книга Евстафія Божеслова.

3. Тетрадь, содержащая ложное толкованіе Амфилохіево вторыя пѣсни Моисеовы.

4. Тетрадь подъ названіемъ: Слово отъ старчества, инока Захарія ко ученику своему Стефану.

5. Тетрадь лжесоставленное толкованіе десяти перстѣ и десяти роговъ звѣря.

6. Тетрадь о бражникѣ.

7. Тетрадь о винномъ сотвореніи.

8. Тетрадь о картофлѣ, мнимо отъ Пандока и другихъ книгъ.

9. Тетрадь, содержащая странное мудрованіе о духовномъ антихристѣ.

10. Тетради лжепророческія, въ нихже назначается время и день кончины міра и втораго пришествія Христа.

Яже вся суть ложная и баснословная сочиненія, въ нихже проповѣдуется пресѣченіе Хриstopреданнаго священства, скончаніе новоблагодатнаго закона, царствованіе послѣдняго антихриста, который аки бы возсѣ-

даеть на престолѣхъ олтарей господствующей нынѣ въ Россіи церкви, яже аки бы иному Богу вѣруютъ и поклоняется, исповѣдую подѣ именемъ Иисуса не Христа Спасителя, но противника его — антихриста.

Таковая безмѣстная и неглѣпая мудрованія посѣяна быша злонамѣренно отъ помрачившихъ совѣсть безповцевъ, и непримѣтно вкрадаются въ Христоименитыя люди, дышущія простотою и незлобіемъ, и не могущія различити истину отъ лжи.

Оберегая стадо Христовыхъ словесныхъ овецъ отъ душепагубнаго ученія и во отвращеніе таковыхъ неглѣпыхъ мудрованій и всескверныхъ плевелъ, посѣянныхъ посредѣ чистыя пшеницы благовѣрія, предлагаемъ посланіе сіе, и молимъ все Христоименитое достояніе, вкупѣ съ богомудрымъ философомъ, преподабнымъ Максимомъ Грекомъ, глаголюще: «Не всякимъ вѣтромъ ученія обноситься, но со многими опасствомъ и трезвеннымъ разумомъ искушати духи, сирѣчь яже отъ нѣкихъ писуемая книги, аще воистинну отъ Бога суть, по божественному апостолу и евангелисту Іоанну, сирѣчь, аще согласны суть по всему списаннымъ Святымъ Духомъ пророческимъ и апостольскимъ и евангельскимъ священнымъ и правымъ словесемъ, и не блазненнымъ богословскимъ догматомъ возсіявшихъ по нихъ всюду вселенныя Богодухновенныхъ святителей и учителей. Аще же не по всему согласуютъ, [ниже сошествуютъ съ Богодухновенными писаніи, яже отъ нѣкихъ писуемая книги, отринуты и гнушати ихъ подобаетъ, аки хульныхъ и скверныхъ и Бога насъ отлучающихъ ¹⁾... Да внимаемъ себѣ, Гос-

¹⁾ Максима Грека слово 10.

пода ради, и не безъ искуса вѣруемъ всякому духу ученія, но да искушаемъ прилѣжно писанія. аще по всему согласуютъ апостольскимъ и пророческимъ преданіемъ и ученіемъ. Аще бо по нѣчесому разликують. да не примемъ я, но да отвержемъ отъ себе, аки лукаваго бѣса плевель, сѣянныхъ посредѣ чистыя пшеницы благовѣрія на прельщеніе и погибель душамъ нашимъ» ¹⁾).

Послѣдую ученію преподобнаго мужа, возвратимся на вышепредложенная сочиненія, и рассмотримъ безпристрастнымъ окомъ лежащая въ нихъ ложная мудрованія. Начнемъ же сице:

1. Апокалипсисъ седмиголовой въ немже надписуется, аки бы напечатанъ повелѣніемъ благочестиваго государя царя Іоанна Васильевича, всея Руссїи, и аки бы имать четыреста одну главу, а не двадцать двѣ, яко же въ Апокалипсїи святаго Іоанна Богослова содержится, и аки бы Іоаннъ Богословъ толкуеть словенскою рѣчію. Въ сей богомерзкой тетрадикѣ толико зловредныхъ мудрованій написано, яко не точію глаголати, но и помыслити ужасно. Тамо (и во инѣхъ ложныхъ сочиненіяхъ) четвероконечный крестъ зловрѣтится (Оле дерзости!) образомъ сквернаго богопротивника антихриста, идоломъ, мерзостію заупустѣнія, кумиромъ, стоящимъ на мѣстѣ святѣ, и прочая нечестивая порицанія на оный возпущаются; имя Іисусъ приписуется имени самого послѣдняго антихриста; Евхаристія, совершаемая подъ именемъ онѣмъ и четвероконечнымъ крестомъ, нарицается змїинымъ блеваніемъ и агньцемъ антихристовымъ; конечнѣ же проповѣ-

¹⁾ Таможъ, ниже.

дуются истребленіе священной хиротоніи во всей вселеннѣи.

Такое богоборное ученіе священному Писанію и церковному ученію есть несогласно, крестоухульно, еретическо, душепагубно и отнюдь ложно. Ложно, яко надписуется, аки бы напечатанъ повелѣніемъ государя царя Іоанна Васильевича; но печатнаго изданія не точію книги, но ниже единого листа таковаго содержанія нигдѣ не быше и отнюдь нѣсть. Ложно, яко объявляетъ 401 главу; но по содержанію вездѣ у любителей онаго въ малой тетрадѣ обносится. Къ сему же и во Апокалипсіи святаго Іоанна Богослова не 401, но 22 главы положены суть: откуда же 379 главъ приложишася? Ложно, яко баснословить, аки бы Іоаннъ Богословъ толкуеть словенскою рѣчію; но Іоаннъ Евангелистъ во Асіи Христа проповѣда, тамо же Евангеліе и Апокалипсисъ по откровенію Божию написана суть; въ словенѣхъ же не быше, и словенскою рѣчію не толковаше. Славяномъ же перевозванный Андрей благовѣсти спасенную проповѣдь; но и той четвероконечнаго креста не хуляше, о чемъ зри въ житіи его ¹⁾. Отнюду же и ясно зрится: яко псевдоименитый ²⁾ седмитолковой Апокалипсисъ сей составленъ не отъ Іоанна Богослова, но отъ нѣкоего вседерзостнаго баснослова, и есть лжесоплетенная выдумка отъ безпоповцевъ на погибель душамъ христіанскимъ выпущенная. О хулахъ же, въ немъ обносимыхъ, речется послѣжде въ своемъ мѣстѣ.

2. Тетрадь подъ заглавіемъ: Книга Евстафія Бого-

¹⁾ Книга о вѣрѣ, листъ 70 и Миней-Четія нояб. 30.

²⁾ На полѣ: лжеименитый.

слова, истѣ же рещи, площаднаго суетслова, въ ней же проповѣдуется, яко антихристь убіетъ три цари великія: вѣру и любовь и надежду, а прочія семь,— семь таинствъ церковныхъ покоритъ проклятій подѣ себе. И таковое мудрованіе есть еретическо и богопротивно. Аще бо дати сему мнѣнію мѣсто, то посему три богословскія добродѣтели: вѣра, и любовь, и надежда и семь таинствъ церковныхъ имѣють происхождение свое (Оле мрачнаго заблужденія!) отъ звѣря морскаго (егоже Даниилъ ¹⁾ видѣ десять роговъ имуща), отъ негоже и антихристь произыти имать, и сего ради будутъ антихристу ближнія и сродныя, яко отъ того же корене произрастаюша и тѣмъ же отродкомъ и погибоша. И что будетъ безмѣстѣе суетнаго и безумнаго нещеванія сего!

3. Тетрадь, содержащая ложное толкованіе Амфилохіево вторыя пѣсни Моусеовы, есть несогласная священному Писанію, а посему и не приѣмлется православною церковію.

4. Тетрадь подѣ названіемъ: Слово отъ старчества, въ немже аки бы инокъ Захарія бесѣдова къ ученику своему Стефану о антихриствѣ и возвѣсти ему, яко священнической и иноческой чинъ до конца истребится и прочая ложная соплетенія тамо зрятся, яже не что иное суть, точію баснословія, слуху благо-разумныхъ отвратительная.

5. Тетрадь, лжесоставленное толкованіе десяти персть ногъ тѣла, показаннаго Навуходоносору, и десяти роговъ четвертаго звѣря, видѣннаго Даниломъ наводимое о царѣхъ богохранимаго государства

¹⁾ Даниилъ, гл. 7.

Русскаго, есть съ книгою святаго пророка Даниїла и толкованіемъ святыхъ отецъ несогласно, неправды же и ложнаго предсказанія наполненное, въ немже ничто же истинно, но вся суть суетна и ложна. Десять бо персть и десять роговъ знаменуютъ раздѣленіе Римской монархіи на десять частей, а не десять царей державы Русскія, единъ другому послѣдующихъ.

6. Тетрадь, о бражникѣ, подложно подписуемая аки бы изъ Бесѣдъ евангельскихъ, въ нейже баснословится, како бражникъ бражничалъ на земли, и по смерти у вратъ святаго рая стоя, порицаше святаго Давыда царя и Соломона, вкупѣ же апостола Петра и Іоанна Богослова, и тако вниде въ рай. Сочинена, вѣроятно, отъ нѣкоего кощунника, и служащая соблазномъ претыканія къ растлѣнной жизни.

7. Тетрадь, о винномъ сотвореніи, аки бы бѣсъ научи чловѣка хмѣльное питіе варити, и чловѣкъ той за то у царя честь выслужилъ, ложнѣ написуемая аки бы изъ Стоглавника царя Іоанна Васильевича. Но въ Стоглавѣ сего нѣсть. Паче же такое мудрованіе блаженный киръ Зиновій мнихъ, ученикъ преподобнаго Максима Грека, въ 45-мъ словѣ книги своя отрѣваетъ, глаголя: «Хмѣль нѣсть отъ бѣса, яко бѣсъ творити не можетъ ничесоже, едино мечты творити можетъ; хмѣль же Божія тварь, рекшаго: да прораститъ земля быліе травное. Проявленно же убо, яко тогда и хмѣль прораще Божіимъ повелѣніемъ о нѣмъ». (Ниже) «А о еже мнихомъ съ хмѣлемъ не пити, и сіе нѣсть законъ, ниже многа осуженія достойно мню, за еже умыслити соблюдати невлаема мнихомъ ума, притворити имъ непитіе, и сего

ради къ такому уставу произвестися» ¹⁾. Отсюду убо явствуется, яко аще хмѣль не отъ бѣса есть, то и питіе оно не бѣсъ научи варити, но человекѣцы сами изобрѣтоша. Сія же глаголемъ, ложныя басни отрѣвующе, а не пїянству двери отверзающе. Вѣмы бо апостола, вопіюща: брашно (и питіе) не поставитъ насъ предъ Богомъ. ²⁾ И пакы: Не упивайтесь виномъ, въ немже есть блудъ ³⁾. И премудраго Соломона, глаголюща: не винно вино, и проклято есть пїянство, ⁴⁾ его же всякъ христіанинъ удалятися долженъ есть и бѣгати: пїяницы бо царствія Божія не наслѣдятъ ⁵⁾.

8. Тетрадь, о бульвѣ или о картофлѣ, аки бы изъ Пандока и другихъ книгъ, и крыющейся тайно голубицы подложныя выписки, на употребляющихся оный тяжкое запрещеніе наводящія и таковой епитеміи подлагающія, ея же ни въ Кормчей, ни въ Номоканонѣ нѣсть. И сіе мудрованіе еретическо есть, понеже Богосозданное зеліе, на пищу человекомъ дарованное и по естеству употребляемое, глаголетъ быти нечисто, и ложно ссылается на книги, въ коихъ и слѣда о семъ нѣсть: всяка же лжа отъ діавола есть, той бо есть, отецъ жи, и во истинѣ не стоитъ.

9. Тетрадь, о духовномъ антихристѣ, богопротивное сочиненіе, благочестивому слуху не вмѣстимое, хулы же въ немъ обносимыя не лѣтъ есть и писанію предати.

¹⁾ Книга Зиновія Мниха, слово 45.

²⁾ 1 Коринѣ. зач. 140.

³⁾ Къ Ефесеомъ зач. 229.

⁴⁾ Притчей гл. 20.

⁵⁾ 1 Коринѣ. зач. 134.

10. Тетрадь, яже пророческимъ духомъ составленая, назначающая время и день кончины міра и втораго и страшнаго пришествія Христова, есть во истину богоборнаго ученія наполненная, яко вопреки пречистыхъ словесъ Самого Христа Бога ¹⁾ отъ продрзателей произведенная.

Сія убо вышереченныя и другія тѣмъ подобныя сочиненія, отъ наглыхъ невѣждъ составленныя, суть ложныя и Церкви чуждыя, яже предложивше и ложное ученіе во онѣхъ содержащееся объявивше, которое отвергаемъ и отмѣтаемъ. И въ направленіе здраваго разсужденія предлагаемъ здѣ вкратцѣ всѣмъ послѣдователямъ древлецерковнаго благочестія.

Первое.

Святая православнокаѳолическая церковь и священство, вкуцѣ съ приношеніемъ безкровныя жертвы, пребудеть до скончанія вѣка и до дне суднаго, по неложному обѣтованію Господню, якоже глагола самъ пречистыми своими усты: на семъ камени (праваго исповѣданія Петрова) созижду Церковь мою, и врата адова не одолѣють ей ²⁾. И «якоже Христось не умираеть, тако и священство его по чину Мелхиседекову до вѣка не престаеть» ³⁾.

Второе.

Господствующая нынѣ въ Россіи церковь, равно и греческая, вѣруеть не во инаго Бога, но во Единаго съ нами, «Творца небу и земли, видимымъ же всѣмъ

¹⁾ Матѣ. зач. 102, Мар. зач. 62 и Дѣяній зач. 1.

²⁾ Матѣ. зач. 67.

³⁾ Кириллова листъ 77.

и невидимымъ: ¹⁾ глаголю же Святую Троицу единосущную и нераздѣльную: Отца безначальна, Сына собезначальна и Духа Святаго сопрестольна. Исповѣдуетъ и плотское смотрѣніе Христово, во искупленіе рода человѣческаго содѣянное. Почитаеть и честные праздники владычии вкупѣ съ нами (по древнему календарю) не привидѣніемъ, но дѣлительнѣ: Рождество Христово, Срѣтеніе, Богоявленіе, Распятіе, Погребеніе, тридневное Воскресеніе и на небеса преславное Вознесеніе и прочая; такожде и Пречистыя Богоматере, и святыхъ угодниковъ Божіихъ. Поклоняется святымъ иконамъ древняго изображенія, съ надписаніемъ имене Христова: ѿ. хс. Лобызаетъ честный гвоздь и хитонъ Христовъ, святыхъ и чудотворныхъ иконы, и святыхъ угодниковъ Божіихъ мощи. И сими всѣми явственно доказывается, яко во Единого и того же вѣруетъ Бога, Единого и того же съ нами исповѣдуетъ Христа. И такового ради вѣрованія ея, крещеніе совершаемое отъ нея въ три погруженія: во имя Отца и Сына и Святаго Духа, и хиротонія, на основаніи священныхъ правилъ и свято-отеческихъ событій, приѣмлется безъ повторенія.

Вины же нашего непослѣдованія пастыремъ тоя церкви суть важныя и благословныя. Понеже убо попущеніемъ Божіимъ, чрезъ Никона бывшаго патріарха, древлецерковная преданія измѣнившаяся. И въ послѣдствіи соборомъ (съ присутствіемъ греческихъ патріарховъ) 1667 года ужаснѣйшая клятва и анаѣема на держащихъ древняя святоцерковная преданія произнесена и строгое преслѣдованіе и гоненіе воздвигеся съ

¹⁾ Символь вѣры.

мученіемъ. И по сихъ отъ пастырей поборающихъ по новоизложеннымъ догматомъ и преданіямъ бранныя книги издашася, въ нихже святѣйшее и поклоняемое имя Христа Спасителя нашего ꙗко злохульно поречено, аки бы не знаменуетъ Спасителя и Исцѣлителя душъ нашихъ, но нѣкое инаго Ісуса равноухаго ¹⁾. Къ сему же (Оле дерзости!) именоваша чудовищнымъ и ничего не значущимъ ²⁾. Двуперстное сложеніе на изображеніе крестнаго знаменія такожде поречено: аrianствомъ, македоніанствомъ, несторіанствомъ, злобожнымъ раздѣленіемъ, арменствомъ, арменскою ересію, арменскимъ кукишемъ, аріевою пропастію, адовыми вратами, волшебнымъ знаменіемъ, демоноидѣніемъ и чертовымъ преданіемъ!³⁾ Но и въ трехперстномъ сложеніи своемъ ученіе имѣетъ само съ собою несогласно. Въ Скрижали бо, въ Пращицѣ и въ предисловіи Псалтырей повелѣвается въ трехъ перстахъ исповѣдовати оба таинства: таинство Троицы, вкупѣ и смотрѣніе; два же послѣдніе перста имѣти празды ⁴⁾ Во инѣхъ же книгахъ: въ трехъ перстахъ таинство Троицы, въ послѣднихъ же двухъ таинство смотрѣнія⁵⁾. Къ симъ же и иная суть измѣненія, и премѣненія, отъятія и приложенія, яже здѣ исчисляти неудобно есть. Изволяй же да четъ во Отвѣтѣхъ іеродиакона Александра. Такожде въ 50-мъ отвѣтѣ Поморскихъ

1) Розыскъ, часть I, глава 15, листь 18.

2) Никифоръ Астраханскій, стр. 87, изданіе 1854 г.

3) Никифоръ Астраханскій, стр. 336.

4) Скрижаль, стр. 805; Пращица отвѣтъ 54, листь 116; Псалтыря разныхъ изданій.

5) Обличеніе листь 24. Увѣщаніе Плат. митр. листь 45; и Никифоръ Астраханскій, стр. 121.

Отвѣтовъ и въ сочиненіи Никодима инока, въ шести статіяхъ и тридесяти показаніяхъ.

Сихъ ради совѣсть наша не допускаетъ насъ быти въ подчиненіи пастыремъ тоя церкви, иже, къ крайнему сожалѣнію здравомыслящихъ, не обращаютъ должнаго вниманія на исправленіе своихъ полемическихкихъ книгъ и не уничтожаютъ означенныхъ жестокословныхъ порицаній, — порицаній отвратительныхъ, благочестивому слуху невмѣстимыхъ, и христіанскимъ пастыремъ отнюдь не свойственныхъ.

Аще же нѣкогда, благодатію Божіею озарившеся, отложить вышеупомянутая порицанія, и соборнѣ оставить своя новодогматствованія, а «святую старожитность возлюбить и принесть, и порученнымъ себѣ хранить ю повелѣть» ¹⁾, и начнутъ послѣдовати всѣмъ древлецерковнымъ преданіямъ неизмѣнно, и устроится церковь въ таковой точности догматовъ и преданій, якоже быше отъ лѣтъ равноапостольнаго князя Владиміра и до лѣтъ Никона, бывшаго патріарха: «тогда валъ того предѣла въ ровеникъ обратится и единымъ къ другимъ прихождение учинять сердца» ²⁾. И мы безъ всякаго увѣщанія человѣческаго пойдѣмъ ко общенію ея. А донелѣже пребываютъ соблазны и преткновенія, возмущающія совѣсть нашу, то мы не можемъ, вопреки ученія древлеправославныя церкви и вопреки убѣжденію своея совѣсти, послѣдовати новоизложеннымъ догматомъ и преданіямъ.

И сего ради нѣсмы раскольницы и раздорницы, но чада единыя, святыя, соборныя, апостольскія, древлеправославнокаѳолическія Церкви.

¹⁾ Книга о вѣрѣ, глава 25, листь 195 на оборотѣ.

²⁾ Книга о вѣрѣ, лист. 195 на об. Глаголы преп. Максима Исповѣдника, Миней-Чет., генв. 21.

Объявившее убо свое исповѣданіе и священное желаніе, засвидѣтельствуемъ предъ всевѣдѣющимъ Богомъ: яко же удаляемъ отъ порицающихъ древлецерковная преданія, тако не общаемся и хуламъ безпововскимъ, въ вышепредложенныхъ тетрадкахъ обносящимся, на которая чинимъ нынѣ опроверженіе. И молимъ живущаго въ вышнихъ, единаго безначальнаго Царя славы, да послужитъ сіе образцемъ ученымъ пастыремъ господствующей нынѣ въ Россіи церкви, яко да и ти обратятъ должное вниманіе о вышепредложенныхъ жестокословныхъ порицаніяхъ, отъ предѣстниковъ ихъ сочиненныхъ и въ свѣтъ изданныхъ. Мы же всякаго злохуленія отвращаемся и мудствуемъ сице:

Третіе.

О святѣйшемъ и поклоняемомъ Христовѣ имени іѣ.

Пресвятое, пресладкое, прелюбезное и превоздѣлѣнное имя Христа Спасителя нашего, пишемъ и проносимъ во чтеніи и пѣніи тако: іѣ (Исусъ), якоже отъ древнихъ святыхъ переводниковъ въ началѣ на словенскій нашъ языкъ преведеса. И тако пишашеса и проношашеса до лѣтъ Никона, бывшаго патриарха, якоже явѣ зрится въ славянороссійскихъ древлеписменныхъ и древлепечатныхъ книгахъ и на безчисленныхъ святыхъ и чудотворныхъ иконахъ. Посему убо и впредь должно есть содержитися сіе древнее начертаніе и проношеніе неизмѣнно, непреложно и неприкосновенно, не приемля никонхъ нововведеній, ни силлогистическихъ внушеній, и сохранять оное безъ приложенія и умаленія. Сіе бо, по сказанію святыхъ отецъ, знаменуетъ: Спаса, Избавителя, Врача и Исцѣлителя душъ

и тѣлесъ нашихъ. Сиде убо исповѣдающе, со апостоломъ глаголемъ: сіе есть пресвятѣйшее имя, кромѣ котораго нѣсть иного имене подѣ небесемъ, даннаго въ человѣцѣхъ, о немже подобаетъ спастися намъ ¹⁾. И сіе есть поклоняемое имя, еже паче всякаго имене, да о имени Іисусовѣ всяко колѣно поклонится небесныхъ и земныхъ и преисподнихъ, и всякъ языкъ исповѣсть, яко Господь Іисусъ Христосъ, въ славу Богу Отцу ²⁾.

Обаче же и пишемое и произносимое нынѣшними греками и россиянами тако: Іисусъ хулити не дерзаемъ, и не нарицаемъ е именемъ инаго Іисуса и именемъ противника Христова, якоже нѣцыи безпововцы зломудрствуютъ, ибо нынѣ въ Россіи господствующая церковь, вкупѣ же и греческая, подѣ симъ именемъ исповѣдуетъ того же Христа Спасителя, по плоти родословима сына Давыдова, сына Авраамля, рождышагося отъ колѣна Іюдова, отъ причистыя Дѣвы Маріи безъ сѣмене, наитіемъ Святаго Духа, и осмодневное обрѣзаніе приѣмша, таже отъ Сумеона Богопріимца на руку воспріята, во Египетъ отшедша и оттуду возвращьшася, и въ Назаретѣ воспитана, и во Іорданѣ отъ Предотечи крещьшася, и посемъ ликъ апостольскій зобравша, и проповѣдавша Евангеліе царствія Божія, таже отъ ученика предана, распята, и погребена, и воскресшаго въ третій день, и въ четыредесятый вознесшася на небеса, и сѣдѣща одесную Отца. Вѣруеть же, яко паки прійти иматъ со славою судити живымъ

¹⁾ Дѣяній зач. 10.

²⁾ Филипписеомъ зач. 240.

и мертвымъ. Изъ всего вышеозначеннаго прясно показуется, яко того же исповѣдуетъ Христа, Сына Божія, Единосушнаго Отцу, и здѣ нѣсть, и невозможно подразумѣвати инаго Бога или инаго «Исуса» никакоже.

Видится же и въ древнихъ нѣкихъ книгахъ тако напечатано, якоже въ концѣ Библии Острожской печати, изданной въ лѣто 7089-е, на послѣднемъ листѣ, въ два столбца расположенномъ, идѣже на словенскомъ діалектѣ напечатано ѿ, на греческомъ же Иисусъ.

Еще подобаетъ вѣдати: Кіевскій митрополитъ Петръ Могила въ 1645 году издаде Малый Катихизисъ, въ онъже нововнесе трехперстное сложеніе, поливательное крещеніе, и имя Христа Спасителя, вмѣсто ѿ, напечата Иисусъ. Сей Катихизисъ святѣйшій Іосифъ патріархъ московскій, въ 7157 году, вторицею издаде, и несогласная церковному преданію мѣнїя, якоже трехперстное сложеніе, поливательное крещеніе и нововводное имя Иисусъ изъ него исключи; но суда хульна, еже бы Исуса нареци инымъ богомъ, или инымъ Иисусомъ, отнюдь не изнесе. Также и весь освященный всероссійскій соборъ, собравшійся въ царствующемъ градѣ Москвѣ, въ царскихъ палатахъ ¹⁾, ссылаясь о исправленіи церковнаго пѣнїя на Бесѣды апостольскія, изданныя въ Кіевѣ Захаріемъ Копистенскимъ въ лѣто 7131-е, въ нихже во многихъ мѣстѣхъ Христово имя напечатано Иисусъ, видѣша, и въ церковное употребленіе того не прїяша, обаче и суда хульна, еже бы Исуса нареци инымъ богомъ, не точію не изнесоша, но даже о семъ и не глаголаша. Аще

¹⁾ Служебникъ въ десятое лѣто Іосифа патріарха, въ предисловіи, л. 7 на оборотѣ.

же бы отцы всероссійскаго собора Ісуса разумѣли быти инаго бога, то всяко, предосторожности ради, предбудущимъ родовомъ сіе объявили бы: ибо сіе дѣло велико есть и молчанія отнюдь недостойно. Аще же не объявиша, то явѣ есть, яко имя Ісусъ нѣсть имя инаго Бога и нѣсть имя противника Христова. И вся погрѣшность заключается точію въ приложеніи къ имени іѣ, единой гласной буквы и, юже приложивъ печатають и произносятъ Ісусъ.

И понеже убо святѣйшіи московстїи патріарси: Іовъ, Ермогенъ, Филаретъ, Іоасафъ и Іосифъ, во употребленіе сего имени не введоша, и мы не вводимъ, и яко же они хулы и поношенія на оное не положиша, и мы не полагаемъ; паче же и злохуленіе безпоповское, не Духомъ Божиимъ дѣйствуемое, уничтожаемъ и отвергаемъ, такожде и богопротивное ругательство на святѣйшее и поклоняемое имя іѣ, обносимое въ Розыскѣ, Пращицѣ и другихъ книгахъ, и служащее величайшимъ соблазномъ и камнемъ претыканія, отражаемъ и отрѣваемъ, и всѣхъ хульниковъ имени Христова, предаемъ суду того Самаго Всемогущаго Ісуса, иже, егда приидеть во славу своей, воздастъ комуждо по дѣломъ его и комуждо по начинанію сердца его.

Четвертое.

О честнѣмъ и животворящемъ крестѣ.

Вѣруемъ убо и исповѣдуемъ, яко честный и животворящій крестъ Христовъ, отъ трехъ дровъ: кипариса, певга и кедра, въ тридневную смерть Господа нашего Ісуса Христа содѣланъ бысть, яко же предрече о семъ Исаія Боговиднѣйшій, отъ лица Господня глаголя: и

слава Ливанова къ тебѣ приидеть, кипарисомъ и певгомъ и кедромъ вкупѣ, прославити мѣсто святое мое, и мѣсто ногу моею прославлю¹⁾. По сказанію бо учителей церковныхъ, простое древо креста отъ кипариса бѣше, прекое отъ пегва, на немже руцѣ Христовы пригвождены бяху, подножіе же отъ кедра, якоже и Церковь воспѣваетъ²⁾, зывающе: «на кипарисѣ и певгѣ и кедрѣ вознесся еси, Агньче Божій». На немже и дщица (по сказанію нѣкихъ)³⁾ отъ древа масличнаго устроена бѣше, юже Пилать повелѣ положити верху главы Христа Спасителя, якоже вѣщаютъ Божественніи Евангелисти⁴⁾. Сей трисоставный крестъ Христовъ, сицевъ видомъ есть:



Но убо послѣди вольнаго распятія Христова, аще и отъ трехъ дровъ, аще и отъ единого, аще отъ злата, или сребра, или мѣди, и прочихъ металловъ, творить Церковь святая крестъ Христовъ съ воображеніемъ плоти его, равно приеѣмлется и почитается; или токмо единъ крестъ, безъ плоти Христовы, начертавается, яко же на антимисахъ, на просфирахъ, на всенощныхъ хлѣбахъ, на артусѣ, на панагіарномъ хлѣбѣ, и на инѣхъ различныхъ церковныхъ вещехъ воображается, образъ того же креста Христова исповѣдуется; тѣмъ же

¹⁾ Исаія глава 60.

²⁾ Октай: въ среду и пятокъ сѣдал. на утр. третіяго гласа.

³⁾ Григорія Омиритакаго бесѣда съ Ерваномъ, третіяго дне.

⁴⁾ Іоаннъ зач. 60.

и на самѣхъ главахъ священныхъ храмовъ поставляется. Не точію же, но и сокращеннѣ творимый, во образъ того же креста Христова приѣмлетя: якоже водружалъный крестъ, иже подъ престоломъ поставляется, сицевъ видъ имать:



Подобнѣ и четвероконечный крестъ не сѣнь есть ветхаго сѣноваго завѣта. и не упразднися отъ ново-благодатнаго закона Христова. Множае же не есть образъ богопротивника антихриста, и не кумиръ, и не мерзость запустѣнія, стоящая на мѣстѣ святѣ, якоже въ вышереченныхъ тетрадахъ злословится; но образъ есть креста Христова, отъ днѣй апостольскихъ и до нынѣ приѣмлемый православно-каѳолическою Церковію, и видотворимый «сѣнію и начертаніемъ»¹). Сѣнію убо: егда осѣненіемъ руки, свѣщами, дуновеніемъ и огражденіемъ себе рукою крестное знаменіе воображается. Начертаніемъ же: вьнегда масломъ, муромъ, вапы и всякимъ вещественнымъ видотвореніемъ крестъ начертывается. И сице въ тайнодѣйствіяхъ Церковныхъ приѣмлетя, и запечатлѣваетъ я: якоже въ маслопомазаніи, въ муропомазаніи, въ постриженіи власовъ, въ дуновеніи священника надъ водою, и во осѣненіи рукою и свѣщами, и во огражденіи нашемъ рукою, вьнегда знаменуемъ лица своя. Такжеде полагается и на священныхъ одеждахъ діаконскихъ, священническихъ и

¹ Трїодъ пост. во втор. 4 недѣли поста: 2 пѣснь втораго творца, послѣд. стихъ.

архіерейскихъ, иже, ввсегда облачитися кому отъ священныхъ, осѣняетъ первѣе вещь, не крестъ освящая, но вещь благословляя, и потомъ цѣлуетъ крестъ и облачится¹⁾.

А яко крестъ не освящается осѣненіемъ руки, но начертаніемъ своимъ освящаетъ, свидѣтельствууетъ святыи Каллистъ патриархъ, глаголяи: «Идѣже убо начертанъ бываетъ крестъ, благословляетъ, и освящаетъ, просвѣщаетъ, и вся спасенная даетъ»²⁾.

Полагаетъ же такое воображеніе креста и на священныхъ покровцахъ, ими же покрываются Божественный Агнецъ на дискосѣ, и животворящая кровь въ потирѣ. Иже убо, идѣже съ залогомъ воспоминанія Христова за ны страданія воображается, или начертывается, образъ креста Христова и есть и глаголется, якоже научаютъ о семъ святіи и богоносни отцы, имже Церковь послѣдуя, исповѣдуетъ, яко сѣнію и воображеніемъ креста сокрушаются вся сопротивныя силы, якоже явствуется въ молитвѣ на крещеніе челоуѣкомъ надъ водою, юже іерей осѣняя крестовидно свѣщами, дуновеніемъ и рукою, глаголетъ: «да сокрушатся подъ знаменіемъ воображенія креста твоего, вся сопротивныя силы» и проч.³⁾.

Не точію же съ залогомъ воспоминанія Христова страданія воображаемое креста знаменіе не отмѣтается, но съ благоговѣніемъ приемлется и почитается; но идѣже еще по прилучаю просто начертанъ, или сложенъ есть видъ креста \dagger : и таковой убо, еще и не

¹⁾ Уставъ Больш., листъ 10.

²⁾ Евангеліе поучительное на Воздвиженіе честнаго креста, л. 402.

³⁾ Потребникъ Большой, л. 102.

почитається святодѣпнѣ, но обаче и не гаждається и не безчестується, якоже гласить 73 правило шестаго вселенскаго собора: «Иже на земли крестъ написанъ, да загладится. Спрѣчь: аще на земли образъ креста отъ нѣкоего написанъ будетъ, или сложенъ, да потренъ будетъ, или разверженъ, да не отъ человекъ невѣдшихъ, или отъ животинъ попоранъ будетъ, и поругано будетъ побѣдное наше оружіе»¹⁾. Но и въ правилѣхъ Іліи архієпископа новгородскаго завѣщається: «аще на коврѣ кресты, то не спати на нихъ»²⁾. Аще же не спати: благоявленно есть, яко и не ходити по нихъ и не попирати ногами. Понеже святая Церковь латинъ именуєть крестопопирателями, паче же и проклинаєть, глаголющи: «Проклинаю латинское лицемѣріе о начертаніи честнаго креста, еже латини творять: входяще въ церковь и крестъ на земли двѣма перстома начертавше, и сего цѣловавше, встають, и паки попирають ногами своими, и тако попирательіе кресту являються»³⁾. Согласно сему и премудрый куръ Зиновій Мнихъ пишетъ, глаголя: «отселѣ же крестный образъ на земли творящихъ проклинати заповѣдуемъ»⁴⁾.

Подъ сію клятву церковную подпадають неизбѣжно кресторугатели безпоповцы, иже ужасными злохуленьми гаждающіи четвероконечный крестъ, мерзостію запустѣнія нарицающіи и печатію антихрисловою (Оле дерзости!) именующіи.

Мы же, яко искупленніи честною и боготочною

¹⁾ Кормчая л. 200.

²⁾ Рукопись древлеписменная, писана въ лѣто 7078.

³⁾ Петр. Больш., листъ 600, въ чинопріятіи отъ латинъ приходящихъ.

⁴⁾ Книга Зиновія Мниха, глава 56.

кровію, на крестѣ изліянною за спасеніе всего міра, со святыми богословцы единомудрствуемъ о честнѣмъ крестѣ Христовѣ, храняще и соблюдающе предѣлы вѣчные, отъ отецъ положенные, неприкосновенно, свято и ненарушимо. И распятіе убо Господа нашего Ісуса Христа пишемъ на трисоставнѣмъ крестѣ неизмѣнно; прочее же, идѣже отъ церкви кій видъ креста гдѣ положися, тако и хранимъ непреложно, и яко образъ креста Христова приємлемъ и почитаемъ, со апостоломъ вопіюще: мнѣ же да не будетъ хвалитися, токмо о крестѣ Господа нашего Ісуса Христа ¹⁾. «Того убо и мы извѣстно держимся креста Господня, похвалы всѣхъ: есть бо намъ спасеніе сіе древо, оружіе міру, нецѣбѣдимая побѣда» ²⁾. Но и идѣже аще по случаю начертанъ, или сложенъ есть видъ креста + , и той не безчестимъ и не хулимъ, первообразнаго ради креста Христова; но по завѣщанію святыхъ отецъ, отъ всякаго поруганія тщимся сохранить, елико сила. Всякое же крестохуленіе и кресторугательство отрѣваемъ, отмѣтаемъ и уничтожаемъ.

Къ симъ же възбраняемъ и запрещаемъ творити крестъ + на неподобныхъ мѣстѣхъ, идѣже не почестъ, но поруганіе можетъ бывати воображенію его ³⁾: якоже на земли, на подовѣхъ, на коврахъ, на игралищныхъ видахъ, и идѣже аще куреніемъ дыма, или зловонія нѣкоего безчестуется, и прочихъ тому подобныхъ. Аще ли же гдѣ что таково обрѣтается, повелѣваемъ загладити, или потерти, или разврещи, по силѣ 73-го

¹⁾ Къ Галатомъ зач. 215.

²⁾ Икосъ кресту.

³⁾ Матѣ. Правил. составъ 200, глава 3.

правила шестаго вселенскаго собора святыхъ и богоносныхъ отецъ.

Пятое.

Безпоповцы, не исповѣдующи приношенія безкровныя жертвы на лица вселенныя, дерзостное ругательство наводятъ на Евхаристию, нынѣ совершаемую въ греческой и россійской церкви. Но таковымъ протерзателемъ затыкають уста восточнии учителя: священнѣйшій Іоаннъ Китрожскій, преподобный Матѳей Правильникъ, и всечестный Севастъ Арменополь, иже о римскихъ опрѣснокахъ пишуше, и причащатися онѣмъ не повелѣвають, но благословнѣ и за простыя не вмѣняютъ, призыванія ради Господня и святаго Іакова брата Божія священныхъ припѣваній, надъ ними совершаемыхъ¹⁾. Аще же убо о опрѣснокахъ римскія церкви таково есть заключеніе толкователей священныхъ правилъ, и отъ святыя Церкви не испредѣлено: убо мудрованіе безпоповское о Евхаристіи греческія и россійскія церкви зловредно есть. Ругательство же, наводимое ими на таинства, совершаемая по древлецерковному преданію въ нашей православно-каѳолической Церкви, зѣло богохульно и душепагубно есть.

Сихъ ради винъ, завѣщаваемъ православныхъ христіаномъ зловреднаго ученія безпоповскаго не слушати, и вся сочиненія ихъ, вышешпоименованная и иная, направленная на истребленіе церковныхъ таинствъ и въ поруганіе святыни, не согласная священному Писанію и церковному ученію, повелѣваемъ огнесожженію предати, яко плевель, сѣянныхъ отъ врага на прелесть

¹⁾ Кормчая древлеписменная, гл. 57. Матѳей Правил. составъ ѿ, глава 12. Севастъ Арменополь, книга 5, отвѣтъ 3, архіепископа Димитрія Хоматина.

душамъ христіанскаго рода, якоже гласятъ священная правила и преподобный Максимъ Грекъ совѣщаетъ¹⁾).

Шестое.

Къ сему же завѣщаемъ и молимъ, вкупѣ съ верховнымъ апостоломъ Павломъ, творити молитвы, моленія, прошенія, благодаренія, за вся челоуѣки²⁾; изряднѣ же о здравіи, и о спасеніи, и о царствіи побѣдѣ, иже отъ высочайшія и вседержащія Божія десницы поставленнаго, и славою и честію вѣнчаннаго, самодержавнѣйшаго, Богохранимаго, великаго Государя нашего, Царя и Великаго Князя Александра Николаевича, и всего Августѣйшаго Дома его, и о всей палатѣ и о воехъ его³⁾, о немже и на святой проскомидіи Божественныя литургіи, въ числѣ великихъ седми, пятая приносится просфира, и приносится будетъ, якоже о немъ, тако и о будущихъ преемницѣхъ престола и скипетра его, въ родъ и родъ, и до вѣка, яко да Господь Богъ соблюдетъ его здрава, мирна и долгоденствующа, да подастъ ему побѣду на враги, да оградитъ державу его миромъ, и да покоритъ подъ нозѣ его всякаго врага и супостата, и да вложитъ въ сердце его благая и полезная о святѣй Церкви, яко да и мы въ тишинѣ ихъ тихое и безмолвное житіе проживемъ во всякомъ благочестіи и честности⁴⁾).

¹⁾ Прав. св. апостолъ 60, шестаго всел. соб. 63, седмаго всел. соб. 9. Максима Грека слово 10.

²⁾ 1 къ Тим, зач. 282.

³⁾ Соборникъ Большой, листъ 360 на оборотѣ.

⁴⁾ Стоглавъ, гл. 9. Служебникъ Юва патріарха. Служебникъ Филарета патріарха. Служебникъ Юасафа патріарха. Служебникъ Юсифа патріарха. И Потребникъ Большой листъ 709. Номоканонъ прав. 210. Бесѣды Апостольскія листъ 2421.

Седмое.

Паки же вторицею завѣщаваемъ и молимъ криво-сказательныхъ ученій бѣгати, и жесоставленная сочиненія, не согласная сказанію и толкованію святыхъ отецъ, не приимати отнюдь, но отмѣтати я, и единомудрствовати вкупѣ со святою Церковію, единоголасно и единомысленно, якоже святѣи отцы предаша и научиша.

Осмое.

И о пришествіи святыхъ пророкъ Іліи и Еноха вѣровати, якоже учитъ святая Церковь, яко предъ кончиною міра сего послани будутъ отъ Бога ко избліченію прелести антихристовы, во своей си истой плоти, чувственно, видимо, и самообразно, и плотскими смертными человѣки видѣны будутъ, и проповѣдятъ благовѣрствіе роду человѣческому, сотворятъ же чудеса и знаменія, и ничтоже ни отъ когоже постраждутъ даже до конца своего си прорицанія, потомъ же исполнятъ мученіе свое, и, отъ антихриста убіени бывше, скончуются, и уже не токмо яко пророцы, но и яко мученицы вѣнчаются побѣдными вѣнцы отъ Вѣнцедателя Бога¹⁾.

Девятое.

Такожде и о антихристѣ подобаетъ со святою Церковію единомудрствовати. Аще бо и мнози суть антихристы, по святому Іоанну Богослову²⁾, но обаче свое-

¹⁾ Святый Иппол. Св. Іоан. Злат. Ефр. слово 105. Св. Теофилактъ. Св. Симеонъ Метафр., іюль въ 20 день. Преп. Іоан. Дамаскинъ. Св. Андрей Кесарійскій. Синокаръ въ педѣлю мясопустную. Прологъ іюля въ 20 день. Святцы Іосифскія, іюля въ 20 день и иніи.

²⁾ 1 посл. Іоан. зач. 71.

образнѣ и особнѣ антихристь глаголется, иже въ конецъ вѣка придетъ, чувственно, видимо и самообразно¹⁾, его же есть пришествіе по дѣйству сатанину, поущеніемъ Божиимъ²⁾. Родитижеся имать отъ племени еврейска, отъ колѣна Данова, седмаго сына Іакова, ветхозавѣтнаго патріарха, отъ нечистыя жены, мнимыя дѣвицы, всескверныя же всяко. «Родится убо отъ блуда, якоже рѣхомъ, и воскормится въ тайнѣ и на-праснѣ возставится, и сопротивится и царствуетъ». Воздвигнетъ же велие гоненіе и мученіе всѣмъ въ вѣрѣ Христовѣ пребывающимъ. Царствовать же имать три лѣта и полъ, якоже учить священное Писаніе и богоносніи отцы сказуютъ³⁾. Его же Господь нашъ Ісусъ Христосъ убіетъ Духомъ устъ своихъ и упразднитъ явленіемъ пришествія своего⁴⁾. Ятъ бо будетъ вкупѣ со своимъ лжепророкомъ, и жива ввержена будета оба два въ озеро огненное, горящее жупеломъ, якоже глаголетъ наперстникъ Христовъ и Евангелистъ Іоаннъ во Откровеніи своемъ, и святыи Андрей Кесарійскій изъясняетъ⁵⁾.

Десятое.

О дни же и часѣ кончины міра и втораго прише-

¹⁾ Книга древлеписьменная Іоанна Дамаскина, слово о антихристѣ.

²⁾ 2 Солуняномъ, зач. 275.

³⁾ Св. Ипполитъ. Зерцало душезрит. Синоксарь въ нед. мясопустную. Книга о вѣрѣ гл. 30, листь 270. Іоаннъ Дамаск. кн. 4, гл. 27. Учителіе церковни. Даніил. гл. 7. Св. Іоан. Злат. Преп. Ефремъ Сиринъ. Кириллъ Іерусалимскій и иніи.

⁴⁾ 2 Солунян. зач. 275.

⁵⁾ Св. Андрей Кесарійскій въ толкованіи на Апокалипс. гл. 19.

ствія Господа Бога и Спаса нашего Ісуса Христа никто же вѣсть, ни ангели небесніи, токмо самъ той единъ¹⁾. Тѣмъ же никому же отъ земнородныхъ о семъ вѣдати невозможно есть и испытословити отнюдь не подобаеть, по реченному: вышшихъ тебе не ищи, и крѣпчайшихъ тебе не испытай²⁾ и прочая.

Въ заключеніе же посланія сего объявляемъ всѣмъ православнымъ христіаномъ, яко, помогающе Богови, составленъ будетъ Уставъ, или краткое изложеніе догматовъ и преданій древле-православно-каѳолическаго исповѣданія единыя, святыя, соборныя и апостольскія Церкви, который и преподанъ будетъ въ руководство и окормленіе всѣмъ православнымъ, священнымъ же и мірскимъ, во еже правѣ и извѣстно вѣдати о догматѣхъ вѣры и о преданіяхъ, о седми таинствахъ церковныхъ, и о инѣхъ нуждныхъ и богословныхъ винахъ.

Наконецъ, паки завѣщаваемъ и молимъ, иже древле-церковная преданія лобызающихъ, хранить вся заповѣди Божія и преданія церковная неизмѣнно, свято и нерушимо, и удалятися всякихъ ересей и раздоровъ и иностранныхъ обычаевъ, имѣти же между себе согласіе и единомысліе во всемъ, и миръ и любовь, яже есть союзъ совершенства, и еже себе негодно, инѣмъ не творити³⁾.

Богъ же мира и отецъ щедротамъ, Богъ всякая утѣхи, собираяй расточенныя и вселяяй единомысленныя въ домъ свой, да собереть расточенныя овцы во

²⁾ Мате. зач. 102. Марк. зач. 62 и Дѣяній зач. 1.

³⁾ Ісуса Сираха, глава 3.

⁴⁾ Къ Колос. зач. 258. Дѣян. зач. 36. Къ Коринѳ. зач. 167. Псал. 76.

ограду пажити своя, и да подасть единомуше и единомыслие всемъ православнымъ христіаномъ, благодатию и человеколюбіемъ своимъ: яко да будетъ едино стадо и единъ пастырь¹⁾. Аминь.

Кіе окружное посланіе
написа се въ царствующій
градъ москвы вѣдѣно 7370
месеци февралѣ въ 24 дѣнь
Божією милостію Смирский
Епископъ Анурій .
Смирский Архидіаконъ Антонъ д.д.
Смирскимъ Свѣтломъ Матрушкѣ .
Смирский Епископъ Беломорский
вероломъ

Свѣтлоінокъ Пѣрсинъ
Свѣтлоінокъ Ілля
Свѣтлоінокъ Пѣрсинъ
Свѣтлоінокъ Федоръ

¹⁾ Іоан. зач. 36.

Меродуаковъ Назаръ
и Евдіюковъ и мнози
Свещеннослужители митрополит.
Указа, Амуніи

61 апр

Ручно іерей^{ск} митрополитъ